

Plenchi

Bèl a bati

TRINGG TRINGGG bèlèm..... TRINGG TRINGGG bèlèm.....

Bèlnan ta anunsia ku preparashon pa pasku a intensivá. Nos a drenta den temporada di atvènt. Siman pasá nos a sende e promé bela pa asina e count down sigui. Kòrda ku preparashon no ke men kambia kortina i fèrf kas so. E kier men hasi bondat pa otronan. Purba varia kada bes i no solamente manda pakete pa esnan pober so. Esei ta un gran regalo berdat, pero e ta poko friu si. Kòrda bishitá esnan ku bo tin basta tempu sin mira. Pone pa bo mes hasi tur siman 2 yamada nan hendenan ku bo a perde for di bista. Wak kon ta ku nan. Kisas un ex kolega, un yaya, un tio òf un madrina o padrino. Atenshon de hende pa hende, djis un yamada pa kòrda nan ku bo no ta lubidá e granito ku nan a aportá den bo bida. Òf invitá un hende solitario pa bin desayuná serka bo. Prepará su desayuno ku amor i kariño, no mester ta kos masha luho. Un sandwich mes ku un kòpi te di yerba ta baha bon si e ta hasi ku apresio.

Ban traha riba e atvent aki ku tur nos amor pa nos próhimo.

Kòrda ku Pietnan tei ainda ta wak kon e muchanan ta komportá e dianan aki, pa nan por raportá na San Nikolas. Pero no ta mucha so nan ta wak, nan ta wak e hende grandinan tambe. Kòrda hasi kos di bon mucha pa bo no mester bai den saku. Mi sa ku tin hende tin gana di bai Spaña, pero pa fakansi, no será den saku si.

Un felis fin di siman pa boso. Kargá ku speransa, wardando benida di Kristu Hesus.

Riba roster

Na kantor di RK grupo di Speransa a habri temporada di atvènt ku un bunita mensahe di speransa. Speransa ta habri kaminda pa sigui prepará pa e yegada di Hesus.



Grupo Bèrdè su mensahe di **Speransa**

Den e promé siman di atvènt, ban prepará pa Pasku pa nos por risibí Hesus un biaha mas den nos kurason.

E Koló Bèrde ta trese **Speransa!!!**

Mgr. Secco i Papa Francisco a bisa:

Atvènt ta e tempu di **Speransa**, un **Speransa** ku hende aktivo, no sintá pasíivamente o pió ainda drumí riba un sofa, pero un **Speransa** ku ta lanta nos foí soño i pone nos kana, ku ta hasi nos atento i vigilante....

Habri kaminda pa Señorrrrr

- 1: E gritu aki ta bisa nos habri kaminda kier men tin **Speransa**?
- 2: Si tin **Speransa**! Pero nos mester pone tur opstákulo un banda, seru haltu mester baha, kaminda korkobá mester bira règt. E ora ei nos ta habrí pa risibí bendishon. Habri kaminda pa Señorrrrr
- 3: Ta **kiko** mester hasi anto pa e kaminda ta habrí?
- 4: Duna esnan den miseria un man. Kompartí un pida pan. Kier men tin speransa pa e pober.

Gritu: Habri kaminda pa Señorrrrr

- 5: Bon ta **kon** mester hasi anto pa e kaminda ta habrí?
- 6: Nos mester kambia nos moda di pensa, tira tur maldat afo! Ban pensa positivo, ban yuda otro, ban kombebi pasombra tin **Speransa** ku kos lo drecha pa ami i abo!!!

Ban sende nos bela bèrdè di **Speransa** pasombra koló bèrdè ta duna nos e trankilidat interno pa nos yega na e grasìa ku nos tur spera riba dje. Duna di bo tempu, duna di e poko ku bo tin, duna bo amor na otro i bo ta risibí e grasìa di Dios.

Not'è riba bòrchi

Djasabra último yufrou Nalini Sewdien, mentor di klas V3G/SDsk di Radulphus College organisá un Jeep Safari pa su klas Yufrou Idelline Hanst tambe a kompañá e grupo di hóbennan entusiasamá.

E Jeep Safari –a kedá di sponsor pa Blue Angels Tours, di famia Herrera- a keiru ku e klas diferente parti di Korsou.

No opstante e awaseru pisá na Banda Abou e guianan a hasi un trabou profeshonal pa regalá e hóbennan un dia yen di aventura. Nan a sera e dia ku un sukelento plato kriyoyo na Dokterstuin.

Yufrounan Sewdien i Hanst, bon trabou! Familie Herrera, un danki di kurason.





Den agènda

Fakansi di skol

- **19 desember pa 4 yanuari**

Dianan speshal:

27 novèmber Kuminsamentu di Advènt
1 desèmber dia di enseñansa i dia di Aids
2 desèmber dia di enseñansa speshal
3 desèmber dia internashonal pa personanan desabilitá
6 desèmber San Nicolaas
11 desèmber dia di sende bela
25 desèmber pasku di nasementu di Kristu Hesus
28 desèmber dia di inosentenan
31 desèmber bispu di aña nobo.

Riba rapòrt

(for di wepsaite di Tur ta Konta)

Djadingu 27 november 2016, Fundashon Tur Ta Konta a organisá pa di 2 biaha e promé rondu di ‘kues tur ta konta’. Di e 24 skolnan ku a inskribí 18 a presentá pa partisipá. Tabata di hopi suspenso i e partisipantenan meresé hopi elogio. E ganadónan:

1. Poule A: St. Franciscus College
2. Poule B: Johan van Walbeeck school
3. Poule C: M.M. Römer school
4. Poule D: Coromoto College

Johan van Walbeeck school i M.M. Römer school tabatin e mihó skor final.

E muchanan ku a skor mihó:

1. Poule A: Ze Xing Wu (St Franciscus College)
2. Poule B: Ajay Ronghari en Julian de Haas (Johan van Walbeeck)
3. Poule C: Zahra Nissa, Himnish Sukhnani, Saul Fillet (M.M. Römer school) en Edmund Millard (St Antonius College)
4. Poule D: Shazyr Jansen (Coromoto College).

Shazyr Jansen di Coromoto College tabatin tur e sòmnan bon. E hóben aki ta esun ku a skor mihó di tur alumno ku a partisipá na e kwes.



Mi ta konta

E pida.

Esun kabes yen ta kana trompeká riba dje.

Esun violento ta usé pa lastimá otro.

E meslá ta konstruí ku ne.

E kunukero ta usé pa sinta deskansá.

Pa mucha e ta un opheto pa hunga.

David a usé pa mata Goliat.

Miguel Angel e famos eskultor a traha un obra impreshonante ku ne.

**Den tur kaso e diferensha no ta e piedra a hasie, sino e persona ku a usé.
Tur piedra riba bo kaminda, bo por usa pa bo propio kresementu.**

Mucha djispou

Yufrou: Sandra, unda e akuerdo di gobernashon entre partidonan MAN, PAR, PNP i PS a keda firmá.

Sandra: “ Abou.””

Yufrou: “Pero kua lugá?”

Sandra: “Riba e último blachi te abou”.